

四庫全書

集部

欽定四庫全書

集部

文苑英華卷五百二十三

五

詳校官給事中臣李臺

助教臣常循覆勘

總校官進士臣朱鈞

校對官中書臣胡紹基

謄錄監生臣邱繹曾

欽定四庫全書

文苑英華卷五百二十三

宋 李昉等 編

田農門二十二道

萊田不應稅判十道  
初稅畝判七道

履畝判五道

萊田不應稅判

勸農使稱萊田舊不應稅州縣令有徵納為例各自不  
同或計畝數均收或隨上下加減百姓紛訴使司科均

收以不應為從重科加減以非法均賦歛州訴恐年飢  
無以給貸且使司法例不平不伏處斷

對

張環

國征九賦農辨三壤用先疇之畝畝則有磽肥輸當年

之井稅寧均沃瘠是以農扈率職夫家受田

一本下有  
墮田二字

較其苗畝底以蔗蓑故我疆我理爰滋翼翼之苗如  
梁如茨卒穫芄芄之稼藝或若此稅其可知今者倬彼  
萊田是稱荒隴畝方兼以三百始受一夫獲寧取於十

千空勤四體雖則休於間歲易在他年徒寒耕而熟耘  
終費廣而收薄永言州縣是曰司存土則異宜畝何均  
稅必以年湏賑乏事欲隨時加減於上下之間徵納於  
權宜之際則謀始立化斯焉可作慢官沮法訟者奚為  
且使以勸農為名人以足食為本民唐諱苟可利賦亦何  
傷責以不應或將得罪處其非法良恐未然湏從刑政  
之科難枉使司之例

同前

皇家刻華歸素抑末敦本式稽堯典授時之政克修載  
歌幽頌祈年之禮尤洽是以野無曠土國絕遊人紅粟  
相因華黍興詠猶復二星分出四牡載馳察俗觀風勤  
分務穡至如分地之利易田之宜擇乎令典酌於故實  
若秋苗有穫則可據地而徵儻春萊不芟焉得計畝令  
納苟貽碩鼠之謗須寘烏一作鷓鴣鳩之典若上田不易自  
有常規妄為加減誠為非法並從鳳舉之按宜正隼換  
之罪

同前

柳同

度地制邑徹田為糧必均三壤之宜以成九賦之則是  
以政令惟簡乃黎庶時蘇法物苟紛必謗讟日浸昔魯  
備齊難作丘甲之法晉為秦擒起爰田之制俱錐刀之  
末開喪亂之始今三時不害四人成功疆理多兩穗之  
收倉廩必九年之蓄惟彼州縣誠非紀綱既無恤人之  
心豈曰奉公之理省徭慎役未挂於愚心貪財徇名已  
間於拙見昔興稅畝嘗聞尼父之媿今欲萊田有類哀

公之志非愛人以治國何深思而淺謀使乎察彼衷情  
允茲上訴下停厚斂寬者爰申寘官嚴刑罪人斯得既  
有雅見實曰良圖

同前

樊光期

國廡為農俾人作畝是刈是穫必在有苗不蓄不畲何  
以望歲故剡未斲耜自春徂秋與疑作雨公及私既庭且

碩然後論彼薄稅取於豐年仍聞寡婦之歌寧有匹夫  
之怨若斯土靡藝大田其荒稼穡之功不加於此寢訛



之地或在其中而欲徵諸我箱問彼嘉穀非苗取實慙  
於老農棄木求華違此通論州縣以廣地為務入粟是  
功用藏於人何必改舊使司以惠言及物準度從人誚  
彼均收黜於加減罪雖一致法欲重科然不伐有詞且  
稱從責隨時之義庶叶論刑

同前

張調

贊王理制國用稽諸縣籍抑有彛典故命敷土聿興五  
服之規用師頒田式均三易之賦歷選列辟率由舊章

國家大賚四瀛咸則三壤穀出不過籍所以豐財萊田  
不致征實惟饒衍麟書是紀象魏攸懸浹日使觀先庚  
以令何彼咨岳猶大禁之因循孰謂法雷亦小東而杼  
軸既徵求之無藝翻給貸之是憂皮之不存毛將焉傅  
百姓不足九式何施外臺則驅鷄善嚴使司則害馬已  
去雅符中典無勞薄言

同前

張寂

我田既臧農夫是慶畝碩則播歲成厥功如茨如梁或

祈於稷稼不稂不莠載嘉於曾田彼之荒萊僻在窮野  
芟夷未絕耒耜何施便加稅畝之徵豈厚生人之道且  
漳河富鄴涇水利秦人既有臧國亦云幸當今百姓為  
心六府脩教命勸分之使崇務本之農漢苑空閒已許  
蕭何之請魯田厚斂見讓哀公之昏人若屢空君孰與  
足州縣以政刑不用輿訟是招使司以公職務平天心  
必稱雖假詞於給貸終失得於當官請寘明刑以鑒多

士

同前

劃為九州咸則三壤或溝洫創制或阡陌從宜肇允萊  
田無間稅畝今欲務耕興利盡地勤農驅役冗食之人  
示以不毛之罰則可規堰瀦一作肥瘠而辨等視烏鹵以分

疆必遵祭猶之中是行什一之稅惟此州縣沮為蓋臣  
不率古猷獨師襟抱而上下加減謂叶裒多之義據畝  
均收欲見無偏之跡曾不知定其可墾則奚適非宜捨  
彼所餘則仁將何遠欲救茲弊圖以拯人異李悝之上

熟同冉求之急賦將恐事非適變狙怒惑於朝三日用  
不知馬力盡於劔百輶軒高責何所逃威外臺薄訴終  
思憲罰

同前

林 諤

倬彼甫田爰分沃瘠定其差等故九州攸同處有勞逸  
誠萬人是繫周官掌事征税畢均皇明燭幽遠邇咸勸  
德音天發直指風行既有察於農功將不遺於屋粟翦  
萊非李路之政就蕪興元亮之詞責郡縣之勞煩慰黎

毗之薄訴借如計畝數以均收隨上下而加減蓋議事以制示得便宜重戒年飢頗符日用苟殊乾沒獲戾何堪使司雖欲科懲愚謂傷於嚴刻且萊田不稅實師古之通方倉庾流行乃自公之上務繡衣匪同楚失應副九重州縣請宥漢章賞其一切

同前

任 璆

宇宙為家實惟天府疆理為畝成賦中邦而九州同風萬國共貫莫不開廬井而平賦稅準沃瘠以明勞逸則

人狎於野穡而成功是以晉置爰田既易種於差美周  
任稍地復出布於不毛相彼萊田是稱餘地舊不應稅  
今則有徵事將利國法焉循古雖紛若人訟而畧陳地  
宜何者彼田若焚薙草溝塍相錯稼穡屢登亦可計畝  
數以均收隨上下而加減必孟春月陳新未事即不應  
而可坐處非法而奚疑况州阻饑饉薄言給貸於均地  
一作輸之法事舉其中軫憂人之道斂從其薄勸農便國  
待子而行即寘徽纆未為允當

同前

楚冕

一作  
與冕

夏闢山川周疆井邑四人得業萬國作孚欲令應陽和  
以歲事候秋霜而畢力故除彼公田人耕百畝用資國  
賦家茂九農是知居瘠即勞處沃便逸必耕與壤以易  
萊田祈南畝之有年望西成而必獲誰謂田其蕪矣似  
陶令之歸來稅輒均收凝魯卿之厚斂使司以愛人治  
國人富則國殷州縣以反裘負薪裘敗則毛落既未閑  
於大體徒輕擬於小東縱訴將備年饑終合請裁天旨



使科非法未失清通

初稅畝判

所司初稅畝怨者實多僉議罪其變法中尉云匪躬之  
故兩執不同

對

王之貴

飭力長財任農勸業利則已久稅宜在均或乘弊以斂  
輕或因虛而斂重邦都以入未息夫家之征倉廩是資  
仍鞭什一之稅籌茲變法初欲贍官亦猶搜粟都尉冀

立阜時之策司農中丞用成強國之筭雖將實於邦府  
恐多奪於吾人人其不足國也何有徵之以古則魯公  
之制難循用之於今則有若之言可尚出其過籍非禮  
誠深言人匪躬過之已甚

同前

趙栖簡

大道既行農不易畝中孚斯及國有常稅各修九賦之  
職寧奪三農之勤惟彼所司於何妄作隳周公之垂法  
行魯宣之弊政穀出不過籍已舉丘明之凡法迺變於

人寧規商鞅之律，叱則骨怨，誰任其辜？主上情殷，納隍慮一物之乖，所見夫栖畝分五穀之荐，登德澤既滂和氣，充塞誠可減從輕賦，須允下人之喜。一作善遂行厚斂，虛憑中尉之詞，事則匪躬，罪當諸已，則屢校滅趾，滋咎未深，而剝牀以膚，取凶斯在。

同前

孔齊參

賦政任人，取之有節，體天立制，惟變能通，猗歟！主司厥初，稅畝稽諸魯策，用採憲章，雖怨咨之諛，實多橫議，而

損益之政或在權宜然則擇利而行何常之有舉以非法斯其病諸較其短長於是乎在

同前

尹深源

先王制禮將使田賦有經中古從權亦由國用不足履畝而稅侵農實多小東作詩見刺於譚后大桀為論甫聞於魯臣既繁杪歲之征同起初寒之怨徒欲附上焉能服人且已効忠未為干典當採議於中尉諒無嫌於所司

同前

高璠

周官立法唯聞薄斂魯用不供爰行大禁皇家布聖敬  
之明德貴因循之令典乃脩弛賦之道不足宜陽之計  
什一而稅億兆以庸何彼所司率由非政不能和彼三  
事中物土之宜而乃鳩于庶眚成取怨之道豈自貉之  
為制其於蠶而不若臨財無苟其曰是乎於義或妄未  
為能也惟此中尉魯無內省若利彼社稷則死生而以  
之數我彝倫任憲章而莫捨益之為助空望於十朋乎

則未終且成乎一握獲夷不同於入腹出否幸從於顛  
趾

同前

張秀明

什一而稅周道如砥二吾不足魯政斯壞國家隣善以  
化寶穀而理上下皆給不學筭車移人邑和大來惟知  
手舞足蹈嗟爾加稅昧我大猷曾不慕於若克坐貽陷  
於大桀將謂浚我有司何取於匪躬寧有盜臣中尉且  
多於尸祿儻能率法抑有前聞若苟而為斯亦奚問

同前

杜 挺

郊賦有籍邦政是敷制乎上地無越三人之倫居彼中  
田常許兩家之共始成薄賦乃曰恤人周末無年魯初  
有制憂稅畝者作自哀公對盍徹乎聞諸有若所以人  
多怨讟國起侵伐動干戈而稅繁供軍旅而儲廣抑為  
末也寧一作未是本歟當今薰風阜財協氣登穀兵則不  
動人其以寧斯足解愠之時奚為變法之稅中尉推過  
罔失臣儀與人頌康當歸帝美兩執斷矣一言在茲

履畝判

丙為諸侯履畝擇其最好者取之百姓上訴御史糾違  
法云非入已

對

常日進

政在利人法難變古苟非慎舉事則不經伊丙列侯無  
聞嘉績未明盡地之力獨聞履畝之稅且以小惠誅一作

殊怨莫見安人之理蘊利生孽先聞入已之嫌重稅既  
同於魯侯盍徹明棄於周典憲臺糾謬實可準繩分土



煩言益為文過敢告司敗宜寘薄刑

同前

盧 術

涼以作法弊尚或貪謀之不臧事將奚適丙桐珪荷寵  
茅土分榮既稱孤之是崇在養人之為政不有如傷之  
視遽興厚斂之文且井屋既殊收稅有數人或不足君  
何取諸苟縱欲之斯行紅粟多積豈堪命之能久黔首  
何安敢請焚書將以和衆遂命持斧以問剖符縱非八  
已之科須當擅賦之責

同前

崔恂

公田有溢私家有封人或不康君孰與足丙分茅賜爵  
剪葉稱孤奪力役於夫家急政教於公府徒使我疆我  
理空對汙萊爾宅爾田惟瞻硠确不勤東作但履西成  
急下民之見糧既同蠹賊務公家之厚斂寧有盜臣豈  
漢文施令之心乃魯宣救弊之術子行而法則有周公  
之典我愛其禮請遵尼父之言未可加刑宜從削地

同前

朱濟

俾侯胙土分茅

一作刺

撫封視彼黔黎均其毛澤今者制

田非夫厚斂殘人履畝尚徇於魯宣盍徹蔑聞於有若  
且農之有畔穀不過籍小桀之規是舉大侵之禮謂何  
此而浚我以生無乃形人之力既貪膏壤取溢京城獨  
阻南勲盡其東畝雖非八已已足盜臣無罔繡衣請從  
褫帶

同前

傅昇卿

制邑居民務農肥國均夫家之閭井永保士房疑徵載

師之遠近將安地著惟丙職登牧伯位列諸侯茂穡勸分須間露冕之化霑體塗足當務曝髮之勞而乃不問公私無論沃瘠取其翼翼之稼擇彼芄芄之田同魯公之無思穀梁是議類季孫之苟賦尼父有言將刺大東何殊小桀嗟狐裘之非當宜豸冠之是糾何者倉惟國廩食則人天雖欲國實於倉其若人勤於食務知遠者不亦悅乎

文苑英華卷五百二十三

欽定四庫全書

文苑英華卷五百二十四

宋 李昉等 編

田農門二十四道

祈年判二道

糞田判四道

命農判二道

學耕判二道

圭田判一道

履畝稅公田判一道

不受征判五道

津吏告下方傷水利判五道

軍士營農判一道

稅畝多於什一判一道

祈年判

甲擊土鼓祈年穀於田祖司察以禮不下庶人寘于罪  
不伏

對

闕名

先王教人貴賤有等常籍為重躬青耜於靈壇終畝惟  
勤法朱紘於御典候烏星之仲月闕龍鱗於上腴祥應  
豳詩祈歲功於土穀疑生魯禮罪越命於金章申即非  
辜擊之可也且援枹而進聲坎坎於田郊嘉粟佇登福

穰穰於歲報司察此舉未曰合宜甲之不伏固當其理

同前

姚重成

饁彼南畝田峻興至喜

一作饁

之歌平秩西成丁壯起務

農之事國家風雷順動黍稷惟馨幸春籍於三推佇年

登於百穀野鷄五色先呈必稔之期銅鵲再鳴即告將

豐之驗千箱萬庾實所荷於聖人土鼓汗尊徒有祈於

田祖况祠祀禮也考擊脩焉司察即是妄稱惟甲固應

無罪

糞田判

或以齋月屠天縣科殺生曰為輕費

乎照切見周禮輕費用犬

所用

對

衛 荼

三壤克辨兆民允殖必廣地財式崇土訓載芟載柞爰  
盡力乎汙萊既方既阜俾恪勤乎稼穡伊趙爾鑄有畧  
其耜荒度厥功寔函斯活是以茨梁嘉積魯孫作庾于  
斯箱畝畝歌豐婺婦栖糧於滯穗率由茲道萬邦乃粒  
眷彼草人兼脩稼政無忝厥職分厚墾之規靖恭爾司



省高卑之制雖陽和布始亟間乎禁殺嗣歲將興必觀  
其行令苟能成憲犬則是屠將周禮之彘章功均物土  
資漢臣之舊業事取糞田叶緹赤以陳宜相嬰疆而有  
旨雖云齋月法欲爰加且八政食乃為先五牲犬實居  
後以牲廢食其傷孔多棄猶務農斯利則博縣道書罰  
誠為昧禮或者張皇宜其窒惕

同前

春扈促農黎人務穡用宜種蒞取化原防苟磽确之不

滋將彊槩之須糞或以今茲齋月言叶上春東作乃興

咸持錢鎛南畝斯儲必漬蕒麻時

疑作待

器所以勸民興

鋤由其阜俗我疆我理庶幾芃芃之秀或耕或耘思播

茫茫之迹九天取歡於歲稔十千期給於公征貪我上

腴陷茲中典且農為理本法在禁弛有利輕墾誠宜重

穀何擊之屠犬而謂殺生應稽諸草人將勤浸種縣司

麗法詎曰優農或且犯齋期於宥獄

同前

趙良玉

國著九賦農分三壤將助鳴鳩之稔是同磔犬之法時  
惟上月德在發生爰取則於周官遂興功於魯胥使我  
疆我理開膾膾之郊原如京如坻藹芄芄之稼穡藝或  
若此業乃可憑彼何為政義守常典徒嚴止殺之方豈  
曰利人之術且成物之急濟時攸重苟能敦本孰謂不  
經禮合時宜尚發犬羊之歎農為政本爰停屠殺之罰

同前

袁自求

地邑人居必叅相得樂功勸事然後相親不易之田畝

百而尚逸再易之地倍三而猶倦漆林之征輕重是舛  
園鄠之稅等差斯別欲均沃墾必資改更故載芟載柞  
澤澤其耕不稂不莠芄芄其稼且輕農用犬彊槩用黃  
在禮經而可遵於憲章乎何有禹貢成賦標乎上中之  
宜周籍立規備設牛鹿之制况明君為政動植以安田  
祖有神螟螣不作科之屠罪恐涉流言寧益國以利時  
豈棄人而愛犬食舊德能保全而不懼

據訟卦注  
當作作

田有

禽利執言而無咎小狐汔濟未出險中即鹿無虞往而

見恤刑云不濫君子盡心有孚匪終渙汗何惕

命農判

得習壤常命農夙駕桑田採茅為索人訴遇雨不充其  
役

對

為天者食分地而利惟茲習壤命彼老農庶夫四體克  
勤三事就緒迺脂車以秣馬及零雨以星言芄野是臨  
桑田攸稅宜其荷蓑荷笠載惜光陰爾茅爾絢不虧晷

夜何乃當既況而自廢假若濡以為詞使七月遺風將  
乖陳業三時務穡有關成功既不昏於作勞誠可繩其  
惰役

同前

博懷海

農為國本本固邦寧人生在勤勤則不匱爰以習壤夙  
駕命農匪鷄則鳴已驅人於里巷白駒未照方執耒於  
疆場克始克終惟掇惟採綿蕞豈禮儀之用縮酒非祭  
祀之須彼茅所資桑田為事時若見奪不利於人宵爾

索綯惟彼南畝田峻至喜意在東臯將以息末取源還  
淳反朴致君於堯舜貽厥於孫謀農人性未適時智非  
及遠苟徒沮事妄作薄言豈遇雨而可憑欲將雪而無  
理

學耕判

得甲於善田者學耕種養苗狀後期里父老罰之云告  
力牛少無以趨事

對

楊 暕

惟農望歲勤穡則稔彼夫失時不畜何獲苟無備於器  
用實謂惰於作勞甲之務分寔亦敦本同我婦子歸田  
畷是司聞於仲尼善樊遲學稼祈養苗之狀將盡地之  
力惟先疇克服何後期有差雖畢達餘萌行春已膏乎  
陰雨而不穡招刺有秋胡取夫斯箱小懲其宜往訴誰  
聽况犢惟不佩則爾牛足餘人有耦耕則我農可理竟  
不趨乎時澤固難免乎罪戾

同前

劉 貺



唯農是務經國之令典日服其鎛長人之美訓皇上躬  
耕千畝儀刑萬邦天報嘉祥風雨時若人惟善誘遠近  
咸勸甲也思趙過之有誨比樊遲之請學爰屬農政條  
興土膏脉起家徒四壁文無五牒是蔗是藜既失於協  
風或耕或耘載愆於零雨實差龍見之序謬以牛少為  
說漢史著區種之術唐臣首代田之教長沮故事則非  
假於服箱勝之遺文亦無資於負轅既推司里之禁宜  
處惰農之刑

圭田判

得甲受圭田所由什一收稅不伏

對

鄭楚容

禹別山河周開井邑諸侯建國錫土之義載光大夫稱  
家食采之文攸著甲因門緒得賦圭田傳糞缺之封襲  
彫班之賞外跡取給私室是殷雖居五等之尊猶均什  
一之稅縣司情以一作深奉法志在優人庶貢賦之取均  
糞上下之攸利權豪罔避貧弱是優所俾無得其人今

詐誠難為理

履畝稅公田判

渭南縣履畝稅而御史劾之曰公田不善恐之軍儲

對

兵惟靜難食以聚兵儻歲計之無虞必軍湏之不繼縣  
司以職其日給科彼倉儲疑疑公田嗟不登於晚歲噉  
噉士卒慮縣罄於糗糧厚斂之旨豈坐於冉求盍徹之  
稅已聞於有若情非徇已事或從權請霽霜簡之威庶

獲雨田之稔

一作庶叶  
國經之體

不受征判

甲有賜田不受征稅

對

王智明

王者制田庶人計畝徵孟子之說徹故難移讀公羊之書禁皆不可然則食土之子與執圭之人按籍既有常法加田固宜不稅此乃行古之道誠非今之宜甲之所執或未為允

同前

賀蘭貴

分畫郊圻敬慎封守必正其經界均其牧井故上行其理而下得其和雖分制之有常蓋貴賤之異等夫畝不稅所以備公私圭田無征所以潔裡祀理具昭著禮有明文豈以伐冰之家同於擊壤之伍甲之不受誠謂其宜

同前

盧禧

農之制地征不過籍德將見優賞莫為稅伊甲也之介

福承賢者之餘慶樹勲公家列爵王冊既未封於列土  
方受賜於加田爰及後昆克奉先業責其徵稅徒稱聚  
斂之臣守以莫從是謂博通之士請依周典無撓戴經

同前

虛象

惟甲受茲明命允膺舊德公侯之勲著在盟府恩澤不  
泯傳之子孫錫圭田以厚賢任王制而無稅徵斯什一  
頗涉無稽之言議以三章終發有孚之訟

同前

李喬年

王者之制加田無征蓋欲崇德厚賢安人薄賦眷言彼  
甲王室作藩既褒德而受圭亦班朝而錫壤且什一而  
稅周之通法緡筭是資漢之舊典萬姓殷阜中外康寧  
有大夫之家尚苦於征稅法令爰著不稽舊章片言可  
折斯之謂矣

津吏告下方傷水判

得津吏告下方傷水請毀左右堤水工丙固爭

對

魏 烜

決河之虞備間前載隄防之設厥務匪輕故得其宜則俗除陘墊如失其道則人受沉淪由是禹得玄珪漢陳白壁古來所慎寧其急諸且將毀右隄則左隄不理下方之弊為患將深漢代成規自宜遵奉不違舊載昧於物宜輕此毀除未間其可水工之議謂得通方

同前

梁 漢

遠通漕引近切河渠擁左右之連隄隨淺深之積態屬流水之至長河杳起桃花森森實類迷牛之闕

一作竹開



箭滔滔方比鑿龍之迅委輸無限傷害為虞既為長堤  
固全豈使下方傷水導之則可毀之匪宜無從津吏之  
言請依水工之見

同前

鄭遂初

九土之宜高卑異等百川之勢面背殊源所以堤設沉  
薪以防其溢河流酸棗竟被其災今者津吏所陳水浸  
方盛請毀堤而取便遂抑強而扶弱考古顏傾之異前  
後垂奉之宜未爽河渠之篇深荷疑溝洫之記工人有

諍即事雖通請更辨於今刑方可遵於古典

同前

盧韻價

覆釜遐源濫觴遙派龍門激浪飛竹箭於千里馬頰驚  
流擁桃花於三月尺波不住素序或臨霧逐牛迷查隨  
客至維舟不易航葦稱難洪濤之委無涯下方之傷溢  
及隄防是制啓塞隨時固之則兩傷毀之乃雙美津吏  
宅生禹迹行偶堯封名厠水官位居河右使迴天之浪  
遙注百川濺日之波滂流九派水工末品真買公心筭

垂柳之懸堤借瓠子之成詠雖守挈瓶之智還貽膠柱之責依津吏之請杜水工之疑不俟終日於是乎在

同前

李仲和

潤下斯弊漂流是虛欲崇堙塞必藉隄防津吏以下方致災冀應除毀水工以長堤作務不可依憑競有兩端事難雙允請闢十里無虧五詞則拯溺不待於規行間諸往說而塞川頗類於防口得以今辰方見河渠之書自閑標準溝洫之志以會規模左毀則右傷右傷則左

弊左右俱毀便沉下方津吏之言雖陳水工之志難奪  
既不合毀咸宜告知

軍士營農判

得丁上書請令軍士自營農隙而教戰節度使稱疲兵  
於隴畝緩急非可用也

對

先王教人必資農本諸侯振旅實因事隙苟法度之不  
率豈黔黎之克安彼丁以阜俗為心類夷吾之寓政節

度以疲兵是恤爽充國之嘉謀昔楚宋理戎尚反築耕之士魏蜀堅壁猶分上下之軍方今九服賓王四夷即序宜脩文以化俗豈黷武而屯師既車書之大同何緩急之爭用兩端之要片言可知

稅畝多於什一判

得縣官稅畝多於什一御史糾其增賦斂訴稱盡供軍旅二猶不足

對

當官而行必議徵斂賦里以入宜均有無政或違於小  
康稅乃行於大桀是以我疆我理分上下之田有國有  
家建中正之術不是過也皆將取焉伊惟縣官昧爾為  
政誠合酌於古訓量其經入使穀不過籍人斯樂輸今  
乃將多徵於前復重斂其後所謂莫益或擊徒聞浚我  
以生雖億兆是謀用給如貔之士而徵求失道寧忘碩  
鼠之詩且九年之儲常聞富國二猶不足匪曰能言請  
從避馬之繩庶叶公羊之訓

--	--	--	--	--	--	--	--	--

欽定四庫全書

文苑英華  
卷五百二十四

十四

文苑英華卷五百二十四



欽定四庫全書

文苑英華卷五百二十五

宋 李昉等 編

田農門二十二道

勞農有關判二道

惰農判三道

棄農判二道

居喪惰績判一道

均輸田判二道

田中有樹判三道

易田請加倍數判一道

給地過數判五道

屯田不開渠判一道

屯田佃百姓荒地判二道

勞農有闕判

冬勞農大酋有闕主司糾劾訴稱六物未備

對

闕名

昔在后稷躬稼宣王命藉用天之道因地之利率先以  
勸敦本斯在是候春鷓初飛鷓彼南畝秋蟬已噪獲乎  
東臯順月令以迎猫佇星迴而合蜡八政罔忒九職攸  
序搜粟多乎教廩典農蓄於京坻以備荒札將禦凶饑  
而穰田滿篝豈用溥于之晒載餽入野常聞王丹之勞

惟彼大酋是稱司醞徒學杜康之藝有憇儀狄之職陶  
器必良工善其事火齊式序職司其憂和羹既用於鹽  
梅合禮必資於麴蘖六物未備胡不及言三農既休忽  
此闕禮使上農空迷於帝力大酋合寘於國章

同前

張榮問

蓋取諸益乃九扈之資始仰法於旗

天門文書酒旗星  
去極七十七度

亦六齊之攸作國家制事利物順時設教邇詩土鼓不  
忘舊章飲酒勞農聿修前典屬務畢南畝歲居北陸司

穡無事索綯以居維彼野人草笠斯糾我皇流澤既一弛而  
一張農夫力田必強飲而強食俾乎老物是息峻人醉  
止百里以洽一國若狂瞻彼大酋掌此公酒既益緹之  
有闕云秫稻之未備人而是糾方事畢修職司其憂必  
作事而謀始欲求無咎豈惟刑之可逃

惰農判

甲有田不耕被罰三夫稅粟以質劑致人甲告旅師施  
惠散利法司科旅師罪不伏

對

敬授區分經邦所重峻農懋力緯俗攸先行夏正於東  
郊黎元不惑歌豳風於南畝田峻知勸逖覽藏書率由  
茲典乙逢昌厯甲預堯封玉燭時和無聞於勸勵金刀  
產匱罕見於籌謀異楚客之逃名耕耘不嗣匪梁巖之  
徇節薦藜何施行有察於農功遽見徵於屋粟質劑爰  
致投告旅師施捨未忘貽刑司敗採周年之故事頌叶  
常規求聖日一作音之明科稍乖通典但以薄言未息被

罰猶嫌簡孚五詞詳明八辟待窮根抵方寘彙條

同前

儀崇哲

三推貽訓昭賁於天田萬井開規發揮於地利故五稼  
庭碩成厚下之道四毗阜滋得奉上之績甲圭衡賤彙  
農保浮生青郭無起伏之田綠野有菑畲之地爰稽版  
籍舊一作應列郊封匪蠶而衣著於前誠不耕而食豈免  
復科且甲異嗇夫師非田畷瞻惟惰窳不勤百畝之勞  
空致質劑未舍三夫之稅訟旅師之散利以避罰而尤人

美疑合券以免科終飾非而為已眷茲甲罪宜峻刑章  
惟彼旅師請從寬典

同前

九扈分官四星垂彩廢其業則金湯莫守修其本則禮  
節是興故晁錯獻書每論春稼仲舒上策特說秋麥人  
之天也其可輕哉甲有良田從來不墾佩犢之風未革  
維魚之夢豈成以粟輸官自貽重罰輒將施惠遂有薄  
言然而周覽經史備觀賢哲漢臣散利不見貽辜齊客

市義無聞結怨欲加嚴罰不亦難乎甲告誠是妄陳旅師請從寬宥

棄農判

乙農家子棄業從戎縣令捕而科之詞云征稅繁重餒在其中苟圖庇身非棄本也

對

三農飭力九穀是資田祖報以斯箱蒸民由其粒食乙輟耕墾上擐甲戎行棄帶經肆力之勤務投筆徇身之



計遂使經行靡望委臺笠於中田尺籍移名閉蓬門於  
故里父耕子播亦足庇身君義臣行如何棄本而乃昧  
洪範之先食決逐剝姚黜素王之去兵輕逃力穡徒託  
詞於凍餒終難逭於刑憲且縣尹之職鄉戶是司觀惠  
儲於字人定否臧於襁負必也稅符大桀詠減唐堯坐  
琴堂以素滄帶墨綬而尸祿自宜褫服寧止免冠待窮  
兩造之詞聊舉一隅之說

同前

張叔政

農政之先戎事之大乙也業惟田畷流匪兵家固當不見異物豈伊敢有貳事屬裔夷壓境殘賊犯邊誰謂百夫之雄且懼二吾之稅退惟憂於餒在進或望於名成

秦揚

漢貨殖傳秦揚以田農而甲一州

之蓋一州非其事也定遠之遊

萬里竊有慕焉誓捐中野之軀寧顧西成之業縣令名

當墨綬志在繭絲惟

一作雞

求化洽之方奚必禁人之犯

况北虜欵塞西戎來王聖朝偃伯之日賢相富人之時已見小康孰虞多難是知且耕且戰荷戈非黷武之夫

足食足兵釋耒豈惰農之士欲令科罪必使正名

居喪惰績判

得甲居喪不績採訪使責太守風化不著訴稱誠恥之  
也是亦為政

對

柴少儒

先王垂教則喪也寧戚君子立身必造次於是甲何為  
者焉知禮乎惰爾庶功隳我王化既稱家而罕制復居  
里而無職且啜菽飲水樂盡其中泣血寢苫孝乎斯在

何必厚藏醢醢傲襄公之送妻自可薄盡有無同子柳  
之塋毋忽而都闕未之前聞不績無緣則周官之故事  
有裘勿服乃邠人之匪臧况八使觀風澄清可尚六條  
曠職政化茂如不懲能軾之懲孰謂蠲筐之責

均輸田判

古泰將均輸地上已籍下人告不合

對

禹制初闢周疆肇建蕭收漢閣益掌虞邦井田有差經

遂無紊順陽和以肅事映秋霜以畢力四時得業萬邦  
作孚豈容吉泰愚駑致心誣妄析言興盜亂名改作革  
公田以入己自犯嚴科移私籍以安居不知天憲往聞  
匡子今觀吉生幸付司刑以議其罪

同前

樊光

大邦列土畀畫有則齊毗分利割據必書苟非躬田無  
或編版功以受錫人其捨諸吉泰攝生明代志事耕鑿  
率情暗昧固貪井屋官未聞於三命謨亦乏於九功匡

救本無封賞何有輒將均輸之地以載克家之籍則弘  
羊歲事今也雖存劉盆祝食此而安取既黷常典合寘  
常刑

田中有樹判

乙有樹於田中里人讓之稱在疆場

對

薛季連

天官分政載師任土必均三壤以務九農乙則匪人其  
何妄作將有樹於田畝誠害稼而傷農稽諸古經則有

之矣考以今制誰曰其然里人有孚可以受服乙也非古宜乎褫帶

同前

張璜

國有謨訓人惟定居非周封之井疆異秦制之阡陌乙有嘉樹森乎甫田上含煙颺下潤溝洫擢本抽幹豈彭澤之五柳負陰向陽等江陵之千橘此乃是地良美蹠條草木有滋稼穡看施饁野之勞益我公私見滿如坻之積縱使羣木聳秀何妨百穀用成今則不廢蔗藜况

乎實在疆場里人之讓未知相土之宜司寇之局須寘贖金之名

同前

緬彼古制攸列場人候農祥之戒晨服先疇之畝畝乙  
偶昌運不知帝功是藎是蓑爰稼爰穡場列瓜蔓圃資  
蔬材藿靡芬芳歲阜其用多稌多黍乃顧於中田優哉  
游哉坐矜於老圃果碩於灌或成蹊而則妨枳樹於籬  
任為疆而何有里人不識輕為誚一作詰讓徒肆無稽之



言難投有戾之任

易田請加倍數判

後篇作  
授田判

乙授易田請加數倍所由以非寬鄉不給訴云三易以  
上

對

敬括

勞役異等廣狹殊制易固有數授惟從宜爾乙於何伊  
田是職衣夫襤襖徒思畝

疑作  
敏

以四支闕彼萊蕪難望

豐其五穀因而上請冀以曲從但務居堵之嫌莫原負

郭之貴且一易再易禮誠舉以加饒近郊遠郊義或隨其衆寡枝辭不已甚所未然

此篇五百二十六卷重出今已削去

給地過數判

甲給地過數科所由曰更耕之田

對

韓秀榮

總目作明

掌地之圖辨邦之數分疆畫野度土居民

唐諱

將以均其

賦役一其征繕俾上下而為宜體磽肥而施法甲之所

給類彼均人度以物情頒其職事我疆我理雖差百畝  
之田如茨如梁何垂一易之地且稽諸王制考彼周官  
當務審其徵求而克均其政令李悝為魏方興地力之  
能管仲相齊式廩軍實之要更耕而穫豈昧隨時受以  
功田雅符通典若科之罪勿使能殖

同前

磽肥異宜給授殊制苟夫田之可易在公道而奚與惟  
甲奉其所主念此為農無怠無荒將陳耕鑿之力是薦

是菘以期國家之利雖在勤不匱而處瘠則勞風雨每  
調莫覩如雲之稼收穫斯至空嗟懸罄之室徒逢時於  
樂土終歎乏於良田懷不足而是憂思鼓腹而何及觀  
其所給察其所由在周典而無辜論漢史而何著惟農是  
恤於法何乖寧易地以豐財豈守株而喪本更耕之訴  
據百畝而何傷過數之科在三章而宜捨

同前

蕪 儻

沃土羸土厥有區分一易再易非無異制實資均政以

利耕者甲有司也政實存焉因資地利之殊計若農家之請庶以通其勞逸齊厥等差實謂更耕克精受授孰云過數且曰守經古可明徵今寧有罰

同前

八政交修桑農為本六官致理富教居先將取地財之生成須辨夫家之沃瘠惟甲率是吏職行乎周禮我疆我理爰受授於三農如京如坻佇陳陳於九穀足使丁壯盡力汙萊合宜何斯有功輒欲加罪若也閭閻櫛比

煙火星繁占天子之牛田廢將軍之馬埒則當惟辨布政求弊是圖况今邊鄙不聳流庸適至宜剪荆棘俾生稻梁勸農既任其易耕給地何限於過數庶從行古未可非今

同前

張澹

凡制農田是分地職家給百畝夫當一厘矧伊所由慎乃厥事善相丘陵坂險能均地邑人居使一易之田加之以二再易之地增之以三蓋居瘠土者勞則宅沃

土者逸將更耕以獲利與不易而方齊故俗阜時康以  
廣數圻之外家給人足寧嗟十畝之間曠土既無代田  
是足欲科之罪其名一作善有詞

屯田不開渠判

甲當屯於戊己校尉故地乙告其常行厭勝之術御史  
按云唯使丁開渠播種不伏科罪

對

富國強兵允資重種闢土殖穀必俟良農雖云因地之

利無與用天之道惟甲克勤稼穡受任軍屯候正歲之  
布和乃宣乃理及王瓜之生夏或錢或鑄遂使其次如  
梁必周戊巳之地其比如櫛不忝京坻之詩眷此屯功  
宜蒙上賞誰聞興利之舉翻招厭勝之訟然而六甲紀  
則剛柔異體五行統歲讓厭分區苟獲賴於柔嘉固無  
嫌於法術况丁也為役職此開渠雖決泄之誠勞豈蒼  
黃而妄告仰稽古訓甲則無辜旁酌人情乙宜致詰必  
若事非政要術異農祥請遵持斧之繩勿恕薄言之訴



屯田佃百姓荒地判

諸畿縣置屯田佃百姓荒地  
主令復業請自耕種屯司  
不與縣司執申若不還地人即却逃

對

李暄


敬承畿縣素匪萊田是中邦之廬伍為上農之井賦日  
者旄頭失象狂寇亂華王師未赫國人猶恐是以苟安  
便地多出近闕惜三逕之就荒歎五溝之不樹人迷可  
復土利宜敦等充國之大開時欣歲足類信臣之廣闢

每詠年豐今乃黎庶重遷歸還樂土服先疇之疆畝守  
故里之松楸將持襁褓願事薦葦誠宜懿彼南畝勞乎  
東郊國本必於務農人安固在循業永言縣執何謝屯  
司

同前

人散久矣地廣大荒開都護之屯田闢天子之縣內且  
耕且戰歲取十千以餉農足食足兵武有七德以威敵  
殊管氏之見奪異周制之不頒且運屬中興人多復業

惟桑與梓詩人興敬止之辭安土重遷縣司敦仁人之  
禮請從地著之業無俾流萍之歎



文苑英華卷五百二十五

欽定四庫全書

集部

文苑英華卷五百二十六至

詳校官給事中臣李臺

助教臣常循覆勘

總校官進士臣朱鈞

校對官中書臣胡紹基

謄錄監生臣邱繹曾

欽定四庫全書

文苑英華卷五百二十六

宋

李昉等

編

田農門二十道

蜡饗不祀判三道

授田判一道

無溝樹判一道

多田判一道

工商食貨判二道

射田判一道

名田判三道

列侯實封判一道

井田判一道

田中種樹判一道

屯田官考績判一道

修隄請種樹判一道

秋零判一道

賑給判一道

修耒耜判一道

蜡饗不祀判

歲十二月有司行蜡饗不祀司嗇迎猫而祭之御史糾云古之君子使而必報

對

陸據

窮陰殺節流歲云暮將舉祀典必參故實無忘報本之

始敬

一作爰

用伊耆之禮聚百物以饗息人大義為一日

之蜡非賜能知瞻言所司是為之祭八神降止一國期  
集於馬觀德必也知古迎猫無闕言除碩鼠之患司嗇  
不預且有若教之餒雖祭能如在樂已吹豳而禮尚有  
疵人多歎魯有鬼或爽誣神若何事乃違經儻受嗤

一作

黜於草服國有報憲宜見繩於繡衣

同前

鄭 岑

大司徒以物地是事小宗伯以人神是圖我稼既同則



田祖斯饗爾酒既旨故嗇夫載馳堯典授時義氏成於  
歲職魯人將事宣父與於蜡賓二三有司是勤執事奚  
不薦守自以速尤至如土反其澤之年水歸其壑之暮  
必合聚萬物而索饗焉欲使仁之深義之盡然後神不  
乏祀人亦報功今者所由實未敦古且藏冰以閔猶祭  
司寒何殞霜既成獨遺司嗇雖云迎猫而祭其如避馬  
有辭且以德勤人豈三施而無報以庸食鼠將一祭而  
未忘况主稼則人食田惟獸棄人與獸雖祭何為如或

不有是神無足稱者一作必也猶能為鬼不其餒而嗟乎主祠何其展事不如林放有問豈得季札無譏卒為漢儒尚見非於齊魯未乖周禮何謬居於滕薛御史執法愚所謂臧

同前

侯上卿

恤祀惟聖頌官有典三冬索饗以蜡昭報日享皇澤非木賜之知歲勸農功首炎一作火帝之奠所司恪謹成式厥圖斯永豳詩土鼓且奏和音表貉昆蟲固茲咸秩雖

田惡鼠之食在禮遵猶以迎豈可獨忘播時見遺司嗇  
伊耆氏之作益不易然大宗伯之聽孰云能守御史以  
冠雄鐵柱糾繆是彰彼以口異金人飾詞猶費徒稱君  
子必報曷若明神處前古而強援使亦奚據請從白簡  
以奏彤廷

授田判

已見五百二十五卷

敬括

無溝樹判

得甲掌事所司劾無溝樹之固云任其財器何用勞人

對

庶官司局共為歲事各守爾典無廢厥職苟政令之或  
乖將會計而焉取甲理從邦教位列遂師甸稍縣都宜  
分地域封疆畝畝不奪人時而乃闕四井之蓄畚廢五  
溝之種藝女桑不樹見戴勝之徒飛夫田無征望竊脂  
而何啄既莫喜於田畷又非成於穡人尚阻農功孰供  
兵器焉見不勞而逸無業而居雖有愛人之詞難恕失  
官之罪

多田判

丁多買田至四百頃極膏腴上賈他財物稱是御史糾之云天恩數加賞賜不是贓賄

對

丁家類封君田成永業是稱近甸亦曰膏腴資貨乃蕪於中人沃野自登於上賈義殊不稽頗謂多藏道則惡盈志何自滿必也德均洙泗學究典墳專經述鄭玄之風精義盡丘明之奧學優則仕道尊為師類張禹之置

田殊蕭何之遺子况稱恩命豈等平人御史繩之終難  
糾結

工商食貨判

得乙為縣令授田不均科之訴云工食功商食貨田故  
少

對

三壤異宜四人差給用懲末作示禁淫利乙任當撫字  
能率典禮以為播植務農實染盛之備貿遷變業非禮

節之本遂用均其利役別以等差類農家之一夫視工商之五口詳夫周禮則異井田之制稽諸漢志是同平土之法冀以無而易有期彼竭而我盈各適所宜足見人而無黨不相僭奪可謂政之有經誠往訴之有孚將議刑而奚據

同前

李覲

給受有數田畝則差何患不均是亦為政顧惟彼乙親物為務則三壤之典平四人之利以為用貧求富猶或

慕於工商化有遷無詎均勞於薦葦聿修稼政式贍農  
人罔愆五口之商俾齊三倍之賈冀使通財易有資殖  
貨以藩身寒耕熟耘望豐年而潤屋不均致訟且曰未  
孚罪欲加之今有辭矣

射田判

或人於京兆府射蔭田

對

三秦奧壤陸海良田原隰條分溝塍脉散涇渭傍潤鄭



白䟽流荷鍾成雲決渠降雨秔稻漠漠黍稷油油無爽  
蟬鳴之期有至鳳冠之稔其地則上厥價惟一作彌高準  
丁而請則無妨廢據勳來射交爽事宜理既不通地湏  
追奪

名田判

乙為列侯名田縣道有司糾云既違新制請沒入縣官  
乙訴云雖已受封實未之國不伏

對

李丹

捨爵策勲必由舉德撫封胙土皆以報功苟薄厚之失  
宜在短長而何據乙之所賞是曰通侯皆受名田享其  
生祿權立四夷之制不殊五等之差經界本出於有司  
賦稅不闕於主一作國未知所過徒肆薄言寧虧采地  
之名以益王官之邑宰之所理事或不然

同前

韋建

錫社啟土開國建侯惟彼占田制無踰等瞻言縣道未  
可裂封乙實無良不能幅利慙晏嬰之辭邑雖謝能賢

非丞相之出關未宜加罪必也異蕭何之窮僻同王立之占求則漢典可遵殷鑒斯在待於閱實方正爰書

同前

杜萬

庸功制爵以國俾侯司勳是職太常是紀錫周官之彛器分漢家之茅土古之成憲今也則殊乙之所封義符分陝介珪入覲盛君子之威容家田無征備優賢之榮寵何縣道之為僭宜有司之見劾徒用多言是為害政

列侯實封判

得甲為列侯以名田縣道所由以違新制合沒官訴云  
雖已受封實未之國不伏仰處分

對

五等疏封三壤咸則其於疆里各有區分甲忝居列侯  
且未之國威儀有翼雖委質於清朝日月其除終望歲  
於嘉穀爰在芄野是用占田將植油油之苗冀獲芄芄  
之稼未侵侯甸之服且近蠻夷之郊於典章而莫違取  
縣道而何害所由未詳漢制恐奪齊人將欲入官無寧

非法

井田判

得縣申歲十月八人里胥使婦人相從夜績每月課四  
十五功聽其歌詠行人善之徇於路按察禁之太師以  
失職致詞

對

元稹

天迴地旋陽生陰息玉衡指孟冬之野促績鳴寒金鼎  
臨短景之昏厥人當燠相彼同色疑作邑懋哉惟時戒坐

塾之里胥稽其既入率同巷之衆婦績以相從素緒霜  
梁共紛如於永漏紅先炎上俱省費於餘輝夜兼功以  
日多日存課而年最若庶叔之勸蜀襦袴興謳類古公  
之居幽茅絢斯誦故令風俗翕習家室乃宜有未得其  
所然或心傷而發詠則標梅求吉編王化之音采芑懷  
征列雅章之內行人掌乎宣布載在搜揚得詠言於此  
邦將遐徇以道邁太師典樂允被克諧之恭按察觀風  
何為失職之禁先王制法寧罰有詞

田中種樹判

乙於田中種樹隣長責其妨五穀乙乃不伏

漢書食貨志種穀必

雜五穀以備災傷田中不得有樹用妨五穀力耕數耘收獲如寇盜之至環志作還廬樹桑云云

對

百草麗地在物雖佳五稼用天於人尤急乙姑勤樹事  
頗害農收列植有味於環廬播穡遂妨於終畝雖倚桐  
梓漆或備梓人之材而黍稷稻粱宜先后稷之穡苟虧  
冒隴馬用成蹊縱有念於息陰豈可侔於望歲植之場

圃合奉周官置在田疇殊乖漢制既難償責無或順非  
屯田官考績判

戊為營田使申屯田官考課違常限省司不收辭云待  
農事畢方知殿最

對

要會有期誠宜獻狀籍畝未入何以稽功戊也將俟農  
收方明績用三時罔害然有別於耗登五稼未終安可  
議其誅賞當從責實寧俾課虛苟欲考於歲成姑合畢



其田事雖賢能是獻比要宜及於計偕而稼穡其難收  
功當俟於協入詳徵著令固有常規農扈之政不乖蘭  
省之非斯在

修隄請種樹判

乙修隄畢復請種樹功價有司以為不急之務乙固請  
營繕令諸侯水隄內不得造小隄及人居其隄內外各  
五步并隄上種榆柳雜樹若隄內窄狹地種擬充隄堰  
之用

對

善防既畢固合程功柔木載施亦將補敗丁之亟請誰  
謂過求隱推之役雖終列樹之思尚切有司見阻無備  
實難苟恡養材之資益非長利遠求為捷之用豈不重  
勞當有取於繕完顧何煩於藝植且十年可待五步足  
徵防在未萌著之先甲因而致用庶無瓠子之災言之  
不從恐類匏瓜之繫

秋雩判

得丙為宰秋雩刺史責其非時辭云旱甚若不雩恐為災

對

白居易

居常授時政則行古恤人救弊道在從宜旱將害於塗  
盛雩難拘於夏景象雷是職不雨其憂苟早魃之愆時  
虐既太甚雖蓐收之戒序雩亦何傷冀有聞於鶴鳴庶  
無慮於狼顧馨香以一作有感夕且望於月離稼穡其傷  
時難遵於龍見雖事乖魯史而義合隨時製錦執言是

亦為政蹇帷致詰未可與權

賑給判

得丁為郡歲凶奏請賑給百姓制未下而

集無而字

散之本

使科其專命丁云恐其

集無其字

人困

對

臨邦賑乏情本由粟為國救災美終歸上丁分條出守  
求瘼居心歲不順成人既憂於二甬公有滯積戶將餼  
以集作於一鍾是輸濟種之成允叶分憂之政然以事雖

上請恩未下流稍違主守之文遽見職司之舉使以未  
有君命何其速歟郡以苟利國家專之可也恤貧振廩  
鄧攸雖見免官矯制發倉汲黯不聞獲罪請宥自專之  
過用旌共理之心

修耒耜判

得甲為邠州刺史正月令人修耒耜庶使責其失農候  
訴云邠地寒

對

教有權節業無易宜地苟異於寒溫農則殊其早晚甲  
分憂率職從俗勉人天時有常農宜先定地氣不類寒  
則晚成雖愆揉木之時未違把草之候正唯庶使何昧  
遺風縱稼器之已修先成焉用苟土膏之不起欲速何  
為誠宜嘉乃辨方豈可詰其行古稽諸呂集作周禮修耒  
雖在於季冬訓比豳人于耜未垂於正月責則迂也訴  
之宜哉

文苑英華卷五百二十六

欽定四庫全書

文苑英華卷五百二十七 宋 李昉等 編

田稅溝渠門十八道

什一稅功臣判一道 受田兼種五菜判五道

為吏私田不善判一道 稅千畝竹判三道

徵什一稅判三道 無夫修堤堰判四道

修河堤不溉田判一道

什一稅功臣判



得京兆府行什一稅功臣不伏云賞地無國征

對

盧士瞻

禹貢三壤周頌九賦此為古制實曰有經且四方無虞  
法宜仍舊三邊有備正可隨時瞻彼咸京是為上國擁  
山川之固護百二稱雄開井邑之菑畲什一編稅將期  
倉庾流行斯箱發詠於詩人軍國豐盈盍徹見遵於有  
若功臣何者曾不是思忘雨露之鴻恩有違上命矜爪  
牙以怙寵無入國征同彼宋人不修職貢類茲楚子闕

薦包茅罰可寘於刑書訟何聽於詭說

受田兼種五菜判

丁受田兼種五菜吏稅之丁云在外田稼不善詣郡科  
吏吏固執合稅久莫能決廉察使按郡守令不行

對

平 伍

度土有衆務農理國人力是借公田為居既八家而共  
資亦五菜而云取惟丁率常由已不遷見異守質抱甕  
將類漢陰之夫閒居鬻蔬未減河陽之令相維彼吏而

乃弗經既忘過籍之非將為履畝之稅是同大桀宜刺  
小東且私田於人餘力豈讓吏之不恤稼乃無戒失官  
之譴已彰稅人之理徒執季孫苟賦周典聞仲尼之言  
宣公不仁魯史有穀梁之議吏而多僻守可論刑不能  
蒞官何逃使按

同前

平超然

擇土制邑度地居民

唐諱

是分公私爰制内外食九食五

一作外食制稱上下之農遠郊近郊師有異同之賦彼丁

何者實曰田夫四體初勤五菜云樹既綠葵而白薤亦  
秋韭而冬菁但類潘仁用供朝夕之費同夫揚暉取給  
公上之求公田為居履畝非古考龔遂之政計口而畦  
讀穀梁之書損廬以種稼則不善吏固應科既匪一作匪經  
大猷爰彰薄訴籍而不稅雖固執而奚為分而無成於  
從政乎何有廉使所按誰曰不然

同前

熊季成

度土居民

唐諱

使有寧宇省徭薄賦期於利物政之善者

傳不云乎惟丁計畝受田奉時供上周公之典斯在穀  
梁之志可徵且同居八家並種五菜取其蔥薤既云救  
乏調無樹以楸桑誠得養生送死人苟利矣吾無間然  
此夫伊何多求是務不遵有若之盍徹徒事冉求之聚  
斂况廬舍自損田園將蕪勤私自可以非人率禮無聞  
於稅畝迷而不復過也必文以虧郡守之明宜允使司  
之舉

同前

李黃中

王者域人是制廬井丁之受地用給公私以耕以耘窮筋力於歲月是薦是藜憔悴容鬢於風霜猶旨蓄以禦冬慮艱食而為饑漢陰抱甕殆欲忘懷於陵灌園庶乎自適雖屋粟興稅園塵有征而田畷急民唐諱已闕三時之務誠邦家有賦焉取五菜之供恐非民唐諱之未宜將責吏之為當還同履畝郡令誰可封行請效埋輪庶使即當隼擊

同前

李夷吾

五土異宜三農是務井田肇啟稅畝斯均非無沃墾之  
差實為封疆之異顧惟田峻職在主農徵收雖合以時  
役使宜遵常典安得不供所職有紊彛章將奪三時之  
功用此八家之力俾務農之士東作憊期使擊壤之夫  
西成何望必公田不善即過在夫人私稼靡登乃罪招  
於吏眷言丁訴理或有憑審聽吏詞義將未可今者百  
城滯訟八使舉繩曠官之責自貽不法之名斯在

為吏私田不善判

丙為吏公田善私田不善或以議課不齊辭云非吏之罪

對

康元懷

阜俗敦本長財飭力三時展務九扈分官自公田而及私田俾我疆而豐我理千箱起詠佇美於詩人四體既勤孰慙於夫子當勤甿而有典奚議課以不齊丙也伊何職茲為吏任農均力未恤於人言徇公害私旋招於物議事頗彰於妨奪法難逭於科繩考魯宣之舊章有同



大桀徵穀梁之前志須用小懲宜祥刑於士師盍歸罪於田峻

稅千畝竹判

乙家於渭川有竹千畝京兆府什一稅之云非九穀

對

姚齊悟

度田居民

唐諱

因地制賦出不過籍汜可小康貢之無藝

是稱大桀相維乙也業乃齊民

唐諱

營營四時頗聞潤屋

青青千畝自比封君京兆以任切都城事繁供億主家

戚里無聞菽

漢貨殖傳河濟千樹菽乃梓也後世謂菽為蕭蒿恐合作楸集韻楸菽通用英華作

非菽竹之奢比屋編毗何擅渭川之富俾其什一而稅均

夫播植之家事雖合權道恐非古必也稅同里布征異

漆林自可責以所宜誅其入觀

二字疑

九土之法賦不同

科四人之事業乃殊等今乃責非其有出不以地僕雖

無似竊亦有疑

同前

李 峯

專欲召災蘊利嗇禍克勤於儉庶曰式減乙志在垂竿

居於涓涘師計然之術恥回也之貧侈埒封君竹已遍  
於千畝富同季氏田不播於九穀遂使檀藥之質請擅  
利於膏腴耘耔之功不服勤於錢鎔府司登夫衆寡均  
彼有無爰度百夫之田用收什一之稅誠謂薄賦輕斂  
人無桀黠之誣缶米稷禾國盈流衍之積自可貢其藝  
極弗犯有司豈得莠爾煩言以成無妄曾謂鬻貨不如  
隸農

同前

衛 甫

生民唐諱異業近郊制賦以物地事將均土法惟乙何人

卜居渭汭臨川垂釣未坐太公之茅綠葉翠莖且多子  
猷之竹况梢雲千畝栖鳳五毛豈是齊魯之桑還同漢  
蜀之漆頗為潤屋咸曰比侯京兆救時什一之稅奚與  
乙之無理九穀之訴何為

徵什一稅判

長安縣徵什一稅百姓訴云取已過半人將不農縣官  
云恐國用不足

對

高果

眷彼長安是稱輦轂詢於百姓賦彼三農倘儲廩之未  
供在缺畝而攸給稽諸魯史什一稅而可徵詠彼魏風  
三百屨而斯取是為盍徹未抵彝倫雖過半有詞且悲  
杼柚而官惟恤隱宜室盈庭如或水旱不時薦藁無取  
歲莫資於稼穡人必慮其流亡則徹田為糧盡輸王府  
而賑廩同食猶餽疲人將循古而知方亦從權而未與

同前

莊若訥

秦雍皇居田疇為上若年有豐耗稅則等差相彼老農  
聿求多稼勤其四體庶彼千倉必也如京如坻無廢周  
公之典然而不足與足何耻魯侯之問縣司雖守文不  
替訴者亦舉直難違豆區之量必均過半之詞自息

同前

房說

務農重穀徹田為糧布教頒常示人以信不足於二且  
異魯侯拾而糴三非如漢吏况決渠降雨神輿奧區既  
稱百二之雄何辭什一之稅殊大禁而小禁且如茨而

如梁杼軸其空則吾豈敢膏腴兼倍於爾何傷徒許語以無稽湏甘心而受謀抵欺赤縣曾是迷愚家財若不助邊軍實如何取給訴云過半誠為罔上之人又曰不農恐涉要君之責載翕其舌無厚爾顏

無夫修隄堰判

河南諸州申無夫修理隄堰請與之平價仍免外徭省司以為與平價則官無所供免外徭則公事廢闕不之許州訴人實阻饑恐不及冬成至春復桃花水為害

對

元承先

備預不虞古來善策隨事興理今亦宜然於廓長河邈  
界中國來萬里之外歷數州之間榮光載浮竹箭長下  
千里作曲呈瑞馬以出圖三日成霖或迷牛而為害永

言諸郡夾河之壩堯水屢逢媧灰未正

疑作當止淮南  
子女媧積蘆灰

以止  
淫水

俾太守沉馬空竭精誠將軍負薪猶勞太息則必

土功展事金堤爰起匪用齊人之力孰免為魚之歎恭  
聞漢事以蠲六月之徭大哉聖朝實平百姓之價公家



之事知無不為苟利於人胡為不可省司所見未室盈  
庭之辭州訴宜從可塞如川之口

同前

郭尚温

使人以時不奪農務前王令典歷代通規頃屬月離畢  
星天作霖雨緣河諸郡水害方殷王尊之祭徒誠陽侯  
之怒無息是隳堤堰乃請修營動衆興功雖不違於九  
月免徭酬直或大優於百姓握蘭則兩停俱廢恐未得  
於隨時剖竹則二事兼全

一作行

亦頗同於太過况頻遭

墊溺人實阻饑若不久成必貽春慮理須折衷事遣合  
宜則丞相無壞陂之尤將軍免負薪之苦

同前

劉閏

邦寧本固書稱經理之方慮始樂成易著變通之義且  
河分南北境控青徐壤雜下田土為上賦荐逢堯水乍  
闕殷儲感發於中思索其極順時令庀工徒版築爰興  
堤防互設岷然特起同斷岸之孤標的爾殊形狀屯田  
一作雲之錯峙期於永逸沆用小康望免外徭式酬平價

州將當撫循之寄顧瞻黔黎省司應出納之權愛存府  
庫俱為奉國咸是循公探源若混其淄澠究理頗別於  
涇渭何則雖言營造本資其井田徒謂繕修未起於桑  
梓力常有限徭或可蠲役靡踰時價無宜給是則上省  
勞費人忘阻饑無闕於農不憊於素縱使堤踈鉢子不  
復興歌浪起桃花誰能為害

同前

孟楚瓊

五材並用水德靈長八卦裁成坎宮流潤銀河有飄查

之浪金堤苦懸米之憂漢書以溝洫興謠史記乃河渠  
發詠䟽導得理編毗以寧眷彼諸州是稱修葺堤堰縱  
橫瓠子須切黎人阻饑匏瓜莫食遠由蘭署庶救梅林  
何高見之不同而平價之無給夫則非人莫可人則非  
食固存數日暫勞猶宜不許累旬重役焉可闕如官供  
尚且云無私備奚能取濟况國家無事主是唐堯河內  
有倉吏非汲黯但使準格興役何必申省拘文公課自  
有常程令式寧無舊例免徭請價義竊惑焉

修河堤不溉田判

乙主河隄郡守詰其不以溉田詞云亦有以據

對

唐南華

長河千里聖主一清漢帝宣防猶負薪於瓠子王尊東  
郡尚堅立以安人所以河公不仁時聞泛濫主司有事  
每見堤防益却畧於石門亦摧殺其水怒傳以客土將  
全其邑居聚之淇竹實極以昏墊常流不弛於正道泗  
野寧浮於蓄桑諒巡植之為功奚寨帷而見詰必人同

鄭白食我京師或且溉而有餘何屯膏而不作均夫鄴  
令招不智於漳河異彼武安頓遺利於鄒邑良能沃野  
義在隨時請據河渠之書無忘溝洫之志

文苑英華卷五百二十七